



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir_yimyim

tir yimyim **TAPAK 8**

Bihar nung yimdaklirtemi
Minister ka lung agi ona arishi

R Ashwin IPL nung
ojang dang asayatsü



VOL. XXII ISSUE NO. 315 (ADOK 315) DIMAPUR ROGONÜ FRIDAY LUROI (AUGUST) 29, 2025 ₹ 5.00

Nagaland sorkari NH-702 alignment atema telemtetba agiogo

Dimapur, Luroi/August 28 (TYO): Nagaland Deputy Chief Minister, T.R. Zeliang mendenpuba sür temaba jenjang nung ketdangsürtem senden ka amenba nung Longleng, Longching, Mon aser Tizit sendaktepba tongtipang National Highway 702 alignment renemtsü asoshi pangzüng takang ka yanglua liasü.

Option No. 1, Option No. 2 aser Option No. 3 tsüngta alignment atema mangatettep aliba bentettsü asoshi iba senden ya ayongzüka liasü, kong local MLAs Manpong Konyak, Nyemnyei Konyak aser Naiba Konyak; Commissioner & Secretary, Works & Housing; NH aser R&B nungi Chief Engineers tem; Executive Director (P), National Highways & Infrastructure Development Corporation Limited (NHIDCL); Inspector General, Assam Rifles (North) [IGAR (N)], shiba Border Roads Network Action Plan (BRNAP) chairman lir, aser Konyak Union nungi teshimtet lenirtem aser ketdangsürtem dena

liasü.

NHIDCL ajanga technical report aser parnok tangatetba lemsatepba kanga junga asadanger Alignment Option No. 3 ya ajaki mulunga agizük

Alignment tasenba-i kilometer 19 tsüngta yimtsüngtem bypass asüba tebilemstü lemsatepdang Zeliang-i BRNAP chairman dang BRO, NHIDCL aser state PWD den special committee senden ka ayongzüksü tuyua liasü.

Kilometre 19 ya BRO ajanga bendanga anepaludaktsütsü committee nem mapa nungloksür, ta ashi.

Option 3 amshitsü lemtetba ajanga lenmang tajungba yanglutettsü aser BRO ajanga lenmang tejenba anepaluba ajanga yimtsüng kata senzüka metoktsütsü, ta Zeliang-i ashi.

Paisa MLAs aser Konyak Union dang NHIDCL project mapang shidak nung tetsükdak makai renemtettsü asoshi nüburtem den shisa lemsateptsü ayongzüka liasü.

SBlePAY Payment Gateway aser e-GRAS lokteptsü MoU zülutep

Dimapur, Luroi/August 28 (TYO): Government of Nagaland-i Finance Department ajanga SBlePay Payment Gateway facility aser state indang Electronic Government Receipt Accounting System (e-GRAS) lokteptsü atema Memorandum of Understanding (MoU) ka State Bank of India (SBI) den August 28, 2025 nü Finance Department, Conference Hall, Nagaland Civil Secretariat, Kohima nung zülutepa liasü.

SBlePay Payment Gateway aser e-GRAS loktepba ajanga nüburtem, businesses aser institutions temi taxes, fees, duties aser danga revenue amala Government receipts tem tetsükdaktsü kecha makai online agütsütettsü.

e-GRAS ya Government nem tetsübo kecha makai ayong-

ayonga online nung senotsü agütsüba unified digital platform ka lir, kong tangbo digital payment options balala, Net Banking, Debit/Credit Cards, aser UPI amshitettsü, anungji amshitsü tezupaba akumtsü aser timbai amshitettsü aser State Treasury den 'real-time settlement and reconciliation of receipts' inyaktettsü.

Iba MoU zülutepba ya Nagaland indang digital temelenshi asoshi tongtipangalizüng ka alitsü. e-GRAS den SBlePAY secure payment gateway loktepba ajanga state sorkari ochishia, tajungtiba nung nüburtem dak rangloker service agütsüba tali tashi itshir.

Ibai sorkar indang Digital India aser e-Governance den lirumedemer, anungji Nagaland tesem ajungalen e-GRAS amshitsü lenmang lapoktsür.

Mokokchung District Jail atsü chirepa lao



Mokokchung, Luroi/August 28 (TYO) : Mokokchung nung August 27 nü tzünglu kanga sashia aruba ajanga Mokokchung District Jail longbanga atsüba atsü(brick wall) feet 150 shi chirepa laogo.

Superintendent of Jail Mokokchung, L. Bumeng Khiam-i ashiba agi nikongdang

4:30 ako meta atsü-ji chirep. Tepuokertem aliba nungi feet semer shi pilar atsü ya lir, iba wall ya 1980s mapang yangluba aser feet 20 anünglen ajungketa yanglua lir.

Iba wall chirepba ajanga jail nung alirtem yiruba aser tanga osettsüset raksaba kecha matalok.

Tseminyu nung NSF indang 31 buba Inti Mungdang tenzükogo

Dimapur, Luroi/August 28 (TYO): Rengma Students' Union (RUS) tayonger sür RSA ground, Tseminyu nung 'Resilience in Transition' omen kübok Naga Students' Federation (NSF) indang 31 buba Inti Mungdang Bodhbar aonung tenzükogo.

Nagaland aser nisungi yangluba arütsü alema oa aliba NSF units aser sub-ordinates bodies nungi nisung 1400 dak tema iba asemnü mungdang nung dentagi, koba 2025-2027 asoshi ketdangpur tem atema election agia tembangtsü lir.

Mezüng metetpelaba sentong nung Member of Parliament, Lok Sabha, S. Supongmeren Jamir, Introductory Guest liasü aser taoba NSF tatong tir Atokiho Sumi mendenpuba liasü.

Lanurtem rongnung tarutsü lenirtem asütsü aliba ngua, MP S. Supongmeren Jamir-i NSF kibong dak sendakba onük balala, wadang balala nungi parnoki lenirtem adokdaktsüba indang lemsatepa liasü.

Ibai NSF asoshi takok tulu lir aser tarutsü nunga lenir tali adokdaktsütsüla, ta ashi.

NSF-i mangdang tejangja tali adokdaktsütsüla aser itemji bendanga agütsür bushitsüla, ta pai ashi.

NSF-i NSF Martyrs Trophy ajanga saisapong sapang agütsüba atema Jamir-i tenüngsang agütsü aser lanu putu nem maongka tali agütsütsü asoshi inyaksangshi tali bushia inyaktsü ayongzüka liasü.

NSF nung jenjang balala asoshi candidates tasen aika aliba ngua MP S. Supongmeren Jamir temulung asüba lemsatep aser candidate ajunga Naga nunger asoshi nokdaker asünungji, tarutsü asoshi mangdang akaba nübu shimtsü ayongzü.

Paisa Eastern Naga Students' Federation (ENSF) nungi adianutem bilemteta, NSF-i parnok den arok mangdang aser nükjidong lemsatepa kati ya den yariteptsü ajungshi.

Jamir-i kaketshirtem dang Naga nunger kaketshirtem dang

akhi mapang nung amshia aruba tain dang akumtsüboba yimya amshitsü aser elections mapang tajunglen nungi tokteptsü ayongzüka liasü.

Sentong nung Convenor COLA, Benjamin Lorin-i pela agizükba o jembi aser Rengma Hoho aser ENSF nungi salem o lemsatepba sülen candidates tem pei sasa metetpelaba mapang agia liasü.

Iba sentong nung Guru Rewben Mashangva-ia shilem agi aser NSF tongti zülur Chumben Khuvung-i tongti zülur osang agüja liasü.

Member of Parliament, Lok Sabha, S. Supongmeren Jamir den meina G. K Rengma, President Naga Council Dimapur; Jeol Naga, President RPP Nagaland; Akhu Kath, President All Rengma Welfare Organisation Nagaland; Meshenlo Kath, Chairman NPCC Research Department aser host Jwenga Seb, MLA & Chairman, DPDB Tseminyu, Government of Nagaland nungertem arua liasü.

Contract nung shimba MOs tem regularize masütsüla: NMSA

Dimapur, Luroi/August 28 (TYO): Department of Health and Family Welfare, Government of Nagaland ajanga tawa sangdong ka nung contractual Medical Officers/Junior Specialists parnok 98 den danga contractual posts tem COVID-19 mapang shimba department screening inyakyim ka ajanga regularize sütsütsü metetdaktsüba Nagaland Medical Students' Association (NMSA) ajanga khukhua aitsüogo.

Iba sangdong ya junga meshisadangi tapi agi agütsüba, tim masü aser Nagaland Health Service Rules, 2006 nung aibelenba lir, kong Class-I Gazetted Officers ya Nagaland Public Service Commission (NPSC) ajanga kisüng kanga junga advertise sür written examination aser viva voice ajanga shimtsü shia lir, ta NMSA ajanga ashi.

Iba ama totuyuba yagi

Constitution nung tejangrar aser temsüa alirtem tokteptsü temeden agüja aliba agiener aser tajungtiba shimba yimya mezüngshir, koba nübur tenzüksü shimba nung tongtoret lir, ta ashi.

NPSC majangi departmental screening ajanga contractual nung shima alirtem regularize sütsüba ya kanga junga telemtetba agir amshiba recruitment procedures alemyia aoba lir, ta NMSA ajanga ashi.

Iba ya mapa kuma inyaknungbo, state indang Medical Officer workforce ya shilem 40 dak tema tang aser taoba mapang (tesüsa March 10, 2017 nung inyakba) contract nung shimer regularize sütsürtem asütsü.

Anungji nüburtemia state nung healthcare services nung tim masüba yimya nung shimba ya agizüktsü mulunga lir na, ta NMSA-i asüngdang.

Iba ama Class-I Gazetted contract nung anoka aliba regularize sütsüba ajanga Nagaland indang public health service system nung teti asoshi tarak atutsü aser tarutsü nung nübu shimtsü asoshi tetsükdaktsü ajurutsü aser küm aika temsüa aliba nüburtem asoshi maongka magütsütsü, ta ashi.

Department-i 2015-2024 tsüngta NPSC ajanga Medical Officers 61 dang shima lir. Ajisüaka khen sangdongba nung NPSC küboki maitdaktsüi contract nung shima aliba MO 98 regularize sütsütsü merangba ya khentongi meshidak asütsü, kechiaser Nagaland nungi küm ka nung MBBS graduates 152 aser dental graduates 12 adoker.

Anungji Nagaland nung healthcare system lendongi yokdang onok ola madoki ajem-ajema melitettsü, ta NMSA ajanga ashi.

(Maneni tapak 2 nung...)

Ao Lanur Telongjem-i Ungma sangdong bhukumer

Dimapur, Luroi/August 28 (TYO): Council of Naga Cooperation and Relationship (CNCR) tawabangba kübok August 23, 2025 nü Forum for Naga Reconciliation senden amenba mapang Ungma sangdong nung onoki bhukuma nokdaker, ta Ao Lanur Telongjem (ALT) sangdong ka ajanga ashi.

Ao Senden-i ayongzüka Tribal Hohos 34 den Naga Political Groups 16 nung

adenshia iba senden amenba ya reconciliation asoshi mera tasen ka tenzükba alitsü, kong arok yimten mangdang bushitsü züngzüktepa liasü.

Tang ajung asaba lenirtem tangatetba ajanga Naga nunger lokti tesem ajungalen telemsa adok. Naga nunger loktiliba melenshitsü asoshi tongtipang lemjem ka nung alidang NPGs aser Tribal Hohos temi pei tashi amshia nüngdakba temelenshi bener marutetra, lanurtem aser

tarutsü putui nenok dang mepelatsü, ta ashi.

Ungma sangdong ya Naga nungeri telemsa melen telongjem, o tesepra jembiba melen mangdang aser tetsübo melen tarutsü tia shimba anogo ka ama züngshitsü ta shia aliba ya kanga shidak lir.

Tang asenoki tangatetba shidak den shisatsü tajung aliba, tasü tait aser ken o meteter Naga nunger lenir tetemjen nüngdaker, ta ALT sangdong ajanga ashi.

NLEP kübok orientation training ayongzüka agi



NLEP kübok orientation training ayongzüka agiba mapang tangokba noksa nung angur

Dimapur, Luroi/August 28 (TYO): National Leprosy Eradication Programme (NLEP) section kübok Department of Health & Family Welfare-i August 28 nü District Program Officer (DPO) Communicable Disease (CD-II) atema zütsüra (Leprosy) dak sendakba nung anogo ka atema orientation training ka Nagaland Health Protection Society conference hall, Kohima nung ayongzüka agiogo.

Iba sentong ya State Leprosy Officer (SLO) Dr. Ruokuohelie Rutsa lenisüba nung agi, shibai lokti pela agizükba den DPO tem nem training agütsütsü

atema shisalen sayur pelashishia agizüka liasü.

Sentong nung Dr Mereninla Senlem (PD) Principal Director, Directorate of Health and Family Welfare, Nagaland Kohima alakteta jaoker liasü aser Dr. Avile Zao, Mission Director (NHM)-i o tatsüka jembia liasü. Lai ashiba agi, zütsüra ya meimchiri meteta aliba tashidak tejentiba rongnung ka lir, koba aiben tashidak aketertem mesenmetui amshiba ajanga mangu ama toktsüba den anepalu mesüi aruogo, saka tangbo iba tashidak ya junga dang anepalura taneptsü angur.

Laisa, Multi Drug Therapy (MDT) benokba sülen Nagaland ya India nung World Health Organization's (WHO) leprosy elimination target tongtetba mezüngbuba state lir, koba 1998 küm ajangzükteta liasü, ta ashi.

Maneni lai, National Strategy Plan (NPS), koba ajanga 2027 küm tashi nungbo zütsüra meshi meshia samatsütsü nükjidong lir, iba sentong kübok District Programme Officers tem dang Para Medical staff nem mapa balala lezmükja nükjidong tongtettsü atema inyaksü ayongzüka liasü.

Transmission Division, Mokokchung EE-i metetdaksür

Dimapur, Luroi/August 28 (TYO): Transmission Division, Mokokchung Executive Engineer-i sangdong ka ajanga, teküboklen shisema aliba yimtsüng aser jila süia aoba 132/33kv Zunheboto (Lizu) Substation aser 132 kV Zunheboto (Lizu) - Wokha (Philimi) transmission line ya August 29 nü North Eastern Region Power System Improvement Project kübok

rated voltage dak ajemdaker test charged asütsü aser charge südaka ayutsü, ta metetdaksüogo.

Transmission line agi süiba tesemtem:

1. SDO Civil Sadar Zunheboto kübok Lizu New village
2. ADC Atoizu kübok -
 - a. Philimi
 - b. Rotomi
 - c. Akuhaito
 - d. Litsami

Iba dak sendakba nung

nüburtem dang iba transmission line nung mekongshitsü mesüra iba anasa maotsü metetdaksüogo. Tetuyuba sülen manidaki lendong atalokra aji department khuret masütsü, ta kasa sangdong ajanga metetdaksü.

Maneni nüburtem ajak dang iba inyakyim kecha tetsükdaksü makai benoka inyaksü atema teka amteper inyaksü Executive Engineer-isa mepeshia metetdaksüogo.

Aadhaar Universal Client atema training agütsü



Dimapur, Luroi/August 28 (TYO): UIDAI Regional Office, Guwahati-i ayongzüka Nagaland aser Arunachal Pradesh atema August 27 nü Dimapur Town hall nung tawa amenokba online Aadhaar enrolment software, Universal Client dak sendakba nung training ka ayongzüka katsüogo. Iba training ajanga NE nung Aadhaar Operator aser Supervisor tem inyakyim tedangshiba küm daksütsü imlar.

Training nung sorkar ketdangsürtem, Supervisors, Master Trainers aser Operators temi shilem agia liasü. Training session nung

nisung 150 dak temai shilem agi.

Training ajanga Universal Client indang tongtibang feature tem aser iba ajanga tajangzüka agütsübatem aser tamshiba yimya ajungketba aser iba ajanga koda takaraba mapa benoka inyaker iba indang tangazükba agüja liasü. Training nung shilem agirtem dang Aadhaar Enrolment/Update ya Universal Client ajanga inyaksü metetdaksüogo, kechiyong iba yagi mapa tedangshiba aser takaraba nung inyakteter.

Training ya ano arishi küm 5 nungi 7 aser 15 nungi 17

tsüngda aliba tanurtem Aadhaar nung Mandatory Biometric Update (MBU) asütsüba dak rangloker agia liasü. Inyakyim nung tanurtem noksa, fingerprints terprongla aser irises anaprongla scan asüba densema lir.

Aadhaar ya school nung admission, entrance tatidang atema züngoksemba mapang aser scholarships amala agitsü atema nüngdaker. Aadhaar nung tanurtem indang biometric data kanga junga ayutsü atema Aadhaar nung mapang shitak nung Mandatory Biometric Update asütsü kanga tongtibang lir.

CPO aser WSH nati Dimapur nung an tasü ngutetba aitsü

Dimapur, Luroi/August 28 (TYO): Chakhroma Public Organisation (CPO) aser Western Sümi Hoho (WSH) nati, municipal ketdangsürtemi Dimapur nung New Market kübok an godown nung an tasü aika ngutetba aitsüogo.

Iba tatalokba ya tang tasen masü aser mapang shia iba amala inyakyim meshidakba ya puteta arudar. Taoba mapanga an tashi ngutetogo, saka ken o ya kanga junga mebenteti mesüra aibelena alirtem anema jenjang agiba kecha mejangjai tembangogo. Ken o odangtettsüsa minyakba ajanga shishilembartem tali temulung uludaksür aser consumer tem lendong nung toktsür, ta ashi.

An tasü ayokba mesüra rizünga ayuba ya nüburtem health atema amokmeren ka lir. Kija aser kibongtem memeteti chiyongtsü temenen chir alitsü akok aser iba ajanga tashidak tamajung adokdaksütsü ana nung lir. Iba ya Nagaland aser talisa Dimapur nung aliba nüburtem anema inyaksangshiba

ka lir.

Onoki Ward-19 Councillor Ms. Kili N. Sumi aser lar team dang parnok küm küm aliba aser mapang shidak nung meita aoba atema tenüngsang agütsür, koba ajanga lendong aketba inyakyim temai adokdaksüogo, ta CPO aser WSH nati ashi.

Ajisüaka an apuba aser godown shibanga toktsübaji teperi masü. Onoki ken o dak sendaka alirtem indang trade license thitsüba densema tangsa tang jenjang tapet agitsü akhangter. Maneni item nisungtem ya Nagaland aser talisa Dimapur nung shishilembatsü khenyongi memelatsüla, ta lokti tentet ana yagi kasa sangdong ajanga metetdaksü.

CPO aser WSH natisa Law Enforcement Agency, District Administration aser Dimapur Municipal Council dang nüburtem health aser temeden kümzüka ayutsü atema ken o süoki ia agia takaratiba nung jenjang agitsü mepeshia metetdaksüogo.



Kevi Z. Kevichüsa-i züluba kaket "Nino's Secret Friend" August 27 nü The White Owl Director Viketuno Rio-i, Chümoukedima nung White Owl Book Lounge nung sayatsüogo. Iba kaket ya chichiba temeim ajanga taneptsüba, taküm aser timla agütsüba indang lir.

East Dimapur Town Council-i tetuyuba agütsü

Dimapur, Luroi/August 28 (TYO): Taküm June 27 nü tetuyuba agütsüba aser East Dimapur nung aliba nüburtemi ashishiba dak ajemdaker, East Dimapur Town Council kübok inyaksangshia aliba Telecom aser Service Wire Company ajak dang East Dimapur Town Council kübok aliba tesemtem nung wire sangzüa alibatem agitsü mesüra kanga junga anepalutsü tetuyuba agütsüogo.

Tetuyuba benoka inyaksü atema osang agütsüba anogo nungi tenzüka anogo 15

atazkütsüogo. Atakzüka aliba mapang tsüngda tetuyuba benoka minyaktetra East Dimapur Town Council-i osang talila magütsü item wire tem agin tenzüksü aser takoksa mesüra timtem kar danga adokra aji item company tem yagi abentsü, ta kasa sangdong ajanga metetdaksüogo.

Anungji company ajak dang jila teküzmükba kübok merek mereka aser kanga junga benteta ayutsü mepeshia metetdaksüogo.

Contract nung shimba...

(TAPAK 1 NUNGI...)

Pei asoshi bilemba nisung kar aser tarutsü asoshi meshisadangi sentong yangluba ajanga healthcare system tashi mait kumdaksüra, tatem nung nüburtem sa akoksatsü.

Anungji Class-I Gazetted Medical Officers/Junior Specialists 98 aser COVID-19 contractual posts (ajak agi posts 280) regular kumdaksütsü sangdongba ya tangsa agientsüla aser posts ajunga NPSC/NSSB ajanga requisition süa temsüa

aliba candidate nem maongka agütsütsüla, ta NMSA-i ashi.

Iba ama tim masüba mapa aser tasa anema nüburtem, kaketshir tentert, NGOs aser tejangrar tem lungjemer nokdaksü ayongzüker ta sangdong ajanga ashi.

Department-i iba tim masüba mapa ya inyakra, onoki democratic tashi ajak amshia state nung tarutsü jenjang asoshi bendanga agütsür nokdaksü, ta NMSA-i ashi.

Pakistan nunger kiralongrar asem Bihar telungi aitogo



हसनैन अली रावलपंडो, पाकिस्तान) आदिल हुसेन (उमरकोट, पाकिस्तान) मोहम्मद उस्मान (बहावलपुर, पाकिस्तान)



Pakistan nunger kiralongrar asem noksa nung angur.

New Delhi, Luroi/August 28

(Agencies): Pakistan nunger kiralongrar asem Nepal arrtsülen nungi Bihar telungi aitba osang lazükba sülen intelligence agency temi taküm election agitsü aliba state nung ketdangsertem nem iba osangji metetdaksüogo.

Bihar Police-i, arrtsülen gari senzüsempongba mita repranger aser district ajak nung police stations nem iba osang metetdaksüogo, ta ashi.

Kiralongrartem ngua police

nem osang metetdaksürtem nem senpet 50,000 agütsütsü, ta sangdongogo, ta police-i metetdaksü.

Osangbenertem den jembidang Motihari SP, Swarn Prabhat-i, "Tanü intelligence agency temi tekümdangtsü osang ka metetdaksüba sülen onoki iba atemaji inyakdar. Arrtsülen gari senzüsempongba ajak mita repranger. District nung police stations aser police ajak nem iba osang metetdaksüogo. Melung

melemi bilemba nisung asem indang osang agütsürtem nem senpet 50,000 agütsütsü sangdongogo," ta metetdaksü.

Police-isa melung melemi bilemba kiralongrar asem noksaji sayaogo. Pakistan nunger asemji Rawalpindi, Umerkot aser Bahawalpur yimitem nungi lir. Item yimti ya Pakistan nung kiralongrartem jenokdaksüba aser Jaish-e-Mohammed kiralongrartem training agiba tesemtem lir. Taküm May ita tetenzüklen India sepaitemi Operation Sindoor kübok Rawalpindi aser Bahawalpur na nungbo kiralongrartem camp-a maakogo.

Bihar police headquarters-i district ajak nung police nem iba osang metetdaksüba den külemi kiralongrartem noksa aser tenüng-a metetdaksüogo. Pakistan nunger kiralongrar asem tenüngji Hasnain, Adil aser Usman nunger lir. Hasnain ya Rawalpindi nungi lir, Adil ya Umerkot nungi aser Usman ya Bahawalpur nungi lir. Par asem ya Nepal nungi Araria district ajanga Bihar telungi ait südi ta bilemer.

Par asemji August tanabuba hopta nung Nepal yimtiba, Kathmandu tonga aru aser taoba hopta Bihar telungi aitogo.

Operation Sindoor mapang ni PM Modi den jembigo: Donald Trump

New Delhi, August 28

(Agencies): Operation Sindoor mapang nung Ato kilonser Narendra Modi aser US Tir Donald Trump na mejembi ta India-i ashir, ajisüaka Mongolbarnüa US Tir Trump-i Operation Sindoor mapang Modi tena jembigo, ta metetdaksü.

Trump-i, Modi den phone ajanga jembiba sülen India o Pakistan na tsüngda rara anena liasü, ta metetdaksü. Trump-i jembiba o dak sendakba nung tang tashi nungbo external affairs ministry-i kecha memetetdaksü.

Trump-i jembiba o dak sendakba nung Bihar kübok Muzzafarpur nung Voter Adhikar Yatra rally nung jembidang Lok Sabha nung Opposition lenir, Rahul Gandhi-

i, US Tiri Ato kilonser dang ghonda 24 tsüngda Pakistan den rara anenang ta ashi, aser Narendra Modi-i ghonda 5 tsüngda rara anendaksü, ta metetdaksü.

India-ibo, Pakistan aser India na nung directors-general of military operations tsüngda jembiba sülen rara anen, ta ashir.

White House nung cabinet senden nung jembidang Trump-i, "Ni rara manendaksü asübo India aser Pakistan na tsüngda nuclear war tenzükla. Parnok tsüngda raraba ni nguogo aser raraba tayimtsü tenet khazüka yokba ni nguogo," ta metetdaksü.

Trump-i, "Ni jangratemtsü nisung India nungi Modi den jembi. Ni pa dang, 'Na aser Pakistan na tsüngda kechi

ataloker?" ta asüngdanga liasü. Iba sülen ni Pakistan den shishilembaba indang jembi. Ni, 'Nenok aser India na tsüngda kechi ataloker? ta asüngdanga liasü. Parnok tsüngda tesempaji khenyongi balaka liasü. Ni nenok den shishilembaba tezüngzüktep meyangluner, kechiyong nenok tsüngda nuclear amshia raratsü ta ashi. Ibaji parnok atema tongtibang liasü," ta metetdaksü.

Taoba ita Parliament nung Operation Sindoor indang jembidang External affairs minister S. Jaishankar-i, April 22 nü Pahalgam amakba aser June 17 tashi nung Trump aser Modi na tsüngda mejembi, ta metetdakja liasü.

Trump-ibo pai May 10 nü Modi den jembigo, ta ashir.

Tetsürtem kümzüka aliba yimti tajungtibaji Mumbai aser Kohima lir

New Delhi, August 28

(Agencies): India linük nung tetsürtem kümzüka alitsü atema yimti tajungtibatemji Kohima, Visakhapatnam, Bhubaneswar, Aizawl, Gangtok, Itanagar aser Mumbai yimitem lir, aser tetsürtem atema yimti tamajungtibatem rongnung Patna, Jaipur, Faridabad, Delhi, Kolkata, Srinagar aser Ranchi lir, ta National Annual Report & Index on Women's Safety (NARI) 2025 nung metetdakja lir.

Iba Index report ya Brihostibarnü saya.

Iba survey nung yimti 31 nungi tetsür 12,770-i shilem agia liasü. Iba Index nung national safety score ji shilem 65 dang lir.

Tetsürtem kümzüka aliba yimti tajungtibatem- Kohima den tanga yimitemji tetsür kasa züngshiba, tetsürtem nem shilem agidaksüba aser tetsürtem jenjang ajungtsüsa infrastructure junga aliba yimitem lir.

"National safety rankings nung jenjang tajungtiba yimitem rongnung Kohima, V i s h a k h a p a t n a m , Bhubaneswar, Aizawl, Gangtok, Itanagar aser Mumbai lir aser iba ranking tsünglanglen aliba yimitem rongnung Ranchi, Srinagar, Kolkata, Delhi, Faridabad,

Patna aser Jaipur yimitem lir," ta iba report ajanga metetdaksü.

Iba survey nung shilem agi tetsür 10 shia nungi tetsür 6-ibo parnok aliba yimti nung tetsürtem kümzüka lir, ta ashi; iba tetezü tetsür shilem 40-ibo parnok aliba yimitem nung tetsürtem kümzüka mali amai bilemer.

Iba study ajangasa, talisa aonung public transport aser südoksünema kazüba teesemtem nung tetsürtem kümzüka mali ta bushitet. Anüngdang shisaliok rejutem nung tetsürtem kümzüka aliba shilemji 86 lir saka item reju aser campus nung aonungbo kümzüka aiba shilemji ajema akümer.

Iba report sayaba mapang National Commission for Women (NCW) chairperson, Vijaya Rahatkar-i, kümzüka alibaji tzüzüng-ozüng tensa ka dang masü, saka iba nungji tetsür ka taküm nung lenla ajak- shisaliolk, health, mapa maongka aser sademsadema senzütetba densema lir, ta metetdaksü.

Laisa, India yangerba nung tetsürtem nem shilem agidaksütsü atema tetsürtem shimang, shisatsü, rongsenketzüng aser digital tsütsü security agütsütsü nüngdak, ta ashi.

Bihar nung yimdaklirtemi Minister ka lung agi ona arishi



Patna, August 28

(Agencies): Bihar nung minister kati Nalanda district kübok Malawan yim semdangba mapang nung yimdaklirtemi tejashi nung lung agi ona arishi.

Gari lenmang lendong nung takoksa angur mangyimertem den tejashi lemsateptsü atema state Rural development Minister aser local MLA, Shrawan Kumar-i iba yimji semdang.

Ganga nung aliba temeshi tesem kati temeshi aini aoba mapang nung auto-rickshaw ka aser truck ka na tsüktepba lendong nung tetsür ti den auto anisang asü.

Nisung teku atema mangyimba sentong nung

adenba sülen Minister ji apusoa aotsü lia yimdaklirtemi minister-i senotsü teyari peria magütsüba agi tejashi nung lung agi ona arishi.

Yimdaklirtem jagi aou-süng aser long amshia kilometer ka jungnüa minister den security sepaitem arishia liasü. Minister Kumar-i anaben tashi gari melenshia amentsüsa aküm aser tesüsa gari tasembuba nung ang jena otet.

Sorkari iba lendong nung asürtem kibong shia nem sen 20,000 agütsür liasü aser ano agütsütsü tebilemba lir.

Anogo ishika tejaklen-a Patna nung longkak aitba sentong ka nung longkak aitertemi minister ka dak lung agi aon.



August 28, 2025 nü New Delhi nung Aadmi Party (AAP) nungi lenirtem- Arvind Kejriwal (tiyong), Atishi aser Saurabh Bharadwaj nungeri osangbenertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 29, 2025

Democracy Tongshi 4buba

- Tangsen Lemtur

India ama democracy linük ka nung osangbenertemi nūburtem nem osang shidak bendena agütsütsüji kanga tongtibang; iba jagi loktiliba yangerba nung tongti shilem agir. Ketdangsertemi nūburtem atema kechisa telemtetba agia inyakdir ibaji nūburtemi meteta alitsü tim. Media dang democracy tongshi 4buba mesüra 'Watchdog of Society' ta ajar, ibayongji nūburtem tenüng nung sorkar ketdangsertem inyaksangshi mita reprangtsüji osangbenertem teinyaktsü mapa lir. Ajisüaka sorkar ketdangsertemi osangbenertem sadema meinyakdaksüra ibaji ajanga nūburtemsa takoksa angutsü. Tawa Nagaland nung osangbener ka yimjak nung merenshiba video ka social media nung kanga prokshiogo, aser iba ama ya tang mezüng ataloker masü. Mapang shia osangbenertem amokmerenba tatalokbatem Dimapur Press Club aser Kohima Press Club-i aija arur. Reporters Without Borders (RSF) teloki linük 180 nung study agia küm shia 'World Press Freedom Index' sangdonga arur. Taküm-a iba Index ya May ita nung sangdongogo. 2025 küm iba Index nung India jenjang 151 buba nung ang lir, aser score ji 32.96 dang lir; iba tetezü India nung osangbenertem sademsadema inyaktetba jenjangji kanga mejungi lir. RSF teloki ashiba agi, alima tesem ajaklen osangbenertemi amokmeren tensa ajurur aser pei mapa sadem-sadema meinyakteter. Alima tesem aika nung osangbenertem anema inyakba kanga bulua kümogo, aser item linük rongnung India-a densema lir. RSF-i ashiba agi, tang alima nung meimchir nütsüng shilem 50 (billion 4 dak tali) aliba tesem nungbo press freedom jenjang kanga mejungi lir. Alima nung osangbenertemi sademsadema pei mapa inyaktetba tesemji shilem 8 dang! 2016 küm iba Index nung India jenjang 133buba nung liasü aser 2019 küm jenjang 140buba nung liasü; iba Index nung India jenjang ano tamajungba dang küma takümbo 151buba nung ang lir. Iba Index nung linük 180 nungi India jenjang 159 tashi akümba osangji sorkari süoki ia magitsüa akok, kechiyong bendang linüktem aser organization balalai India nung meimchir temeden anema inyakba, tamangba lokti kar anema inyakba aser osangbenertem anema inyakba anema ola adokyonga India sorkari linük telung onük nung bendanger maittsüla, ta ashir. 2025 World Press Freedom Index tarensen nung Pakistan jenjang 152buba nung lir aser China jenjang 172buba nung lir. Pakistan ya kiralongrartem poktetdak aser China ya Communist lima ta asenoki linük tamajungtibatem rongnung züngshir, ajisüaka Press Freedom nung India parnok den kecha tepila mali. India nung tongtibang onük balala nung sorkar aija jembirtem dang 'linük anema inyaktertem' ta ajar aser sorkar anema ocet zülurtembo lendong ajurur. Kanga tongtibang onük aika nung nūburtemi metetnūba osangtem mangur, kechiyong ketdangsertemi osangbenertem anema linük anemba ozüngtem nung ajemdaker ken o benoker, kiralongrar aser ozüng alema inyaktertemia amokmerener. Alima nung linüktemi tanga ranking balala atemabo temaba jenjang arishiteper, saka press freedom ranking bo mesükshir. Osangbenertemi sorkar mapa mita repranger, sorkar telemtetbatem sangdonger, alima tesem balala nung tatalokbatem osang bendena proker aser nūburtemi sorkar dang nungi imlaba osangtem adoktsü; yamaji osangbenertem ya sorkar o nūbur na tsüngda otongdar amai lir, ajisüaka kodang osangbenertem sadema meinyakdaksüdir ibaji ajanga nūburtemsa takoksa angutsü.

OLEMSABANG

SHIDAKBA MELENSHITSÜLA

~ M. Meren, Ex.pastor.

(Yashi adok nungi...)

1970 mapang ka nung Topu Town nung Longsa nunger Rongsennungba pastor inyak, par Arogo tenla ki asütsü asoshi Deobar shia sen bendena Mission kibur kidang Arogo tenzükertemi tenzüker ajak lia senji züngdangteper Arogo süngden ka nung tala tulu ka agi shibangasa ayu. Par kidanger asangur chanu ka liasü aser pai tenzükeri sen rizünga ayubaji aiben reprangasa ata, aser kenü mission kiburji kinungtsü tena aluleni aotsüsa aküm, aser kodang tena kidang shinga mali yutsür kimayimtongi mesüra alui odir tenati Mission box dakji teka agi nemeta sarasademersa ayazükasa ao. Kenü asangubaji ki lapoka atu aser pai bena aliba sapi tejung tulu ka nungjagi talaji melamela lapoktet, aser süngden nungji ako ka nung sen tanük aika enoker amendaka liasü, aser ako agi amenbanga sen mirijang ter yua liasü anungji asanguba jagi iba sen nungji tekaji amdak, iba mapang nung kidanger tantsür ka kidang monga liasü, aser mission kidangji nisung ka ali ama lai angashi anungji kimai tanemi lua ki merapoka akabaji anguketa reprangdang nung kidanger asangurbaji süngden nungji amoshia liasü, anungji tantsüalai pa dang ashi, tebu na kechi asür ni pastorba dang ashitsü ta ser asangur chanu ka asema pastorba dangi oa shidaktsü aser pastorbaji asema aru, aser kidang jagi atu nung asangurbaji süngden nungji teka amuoker idakji mena liasü, aser ako nung sen tanük alibaji temadak yua liasü aser süngden taküptsüji jara nung metongloka yua liasü aser asangurba teka nükji telong nung sen alidakji nemeter aser temekok anaprongla atem nung tsüketer aser tekanük achichilenji atem nung nemdaker liasü, pastori ashi tebu kechi asür? Asanguba jagi ashi, sen ya auyarba saka ni menokdakteter ta langzü, pastori ashi tiyazü tejembi, nokdakang, nokdakang? ta tashi agi ashi. Saka pai ashi ni kenyongi nokdaksü makok, arakzütsüa makoker ta langzü, idangji pastorbajia kanga dang süngmang aser aoksa, ya shidakba kechi? Ta süngmang saka pai akba agi tiyazü jembir asütsü ta bilem aser pastorbai asanguba teben nungji amet aser atsütetdang nung makok, anungji pastorbaji tesüngmangtsü aoksa. Pastorbai aritepa Deacon ka aser Secretary ta tajai yok, parnokji ilunga aru, aser kodang tenaji aru pastorbai tena dang ashi ajiang Tsüngremi asanguba teben süngden telong nungi sota yuogo, aser atsütettsü makoker idangji tenajia tesüngmangtsü süngmang aser ya kechi sayatenya? Ta süngmanga ken nokdaker tashi agi merenoktsü aser tang yangi ajemseta endoktsü ta pungten, idangji asangubai jeba ashi, yimlibilema ni atema sarasademjang ta mepishi aser yimlibilema kubu dang teshi pa dang shira pai ni lepsettsü anungji kübu dang teshi saka sarasademjang, sarasademjang ta ajep, (Aürtemia sarasadem aginer) pastorbai ashi na ama auyartembo aser Talisa Arogo sen auyartem Tsüngremi teti yamai sotsü, shidak südi? Pai ashi au, pastori ashi asen koleni odir pai teti asenok ajia alir, anungji nai kodanga mauyatsü südi? Ta nangzükdaksü aser Deaconba nem pa kolak nung nemetdaksü aser pai asanguba teben nung sot aser tashi agi parnok ajaki yamai sarasadem "Kibuba Tsüngrem, tanü onok dang tesüngmangtsü sayatenya tulu sayuba asoshi nü nem tenüngsang tulu agütsür, aser ibai tarutsü putu tashi tansütsü asütsü ta shia sarasadem" aser kodang parnok ajaki amen ta ashi idangyongji melamela tebenji adok aser pasasa nokdak, ibai pastor Rongsennungba den mener ni otsü atongtepa kazüdang pai pa bang ajanga kü dang ashiba lir. Tanü tensa nung Arogo tenzükertemi Arogo rongsen nung tenük yoker aser tanem tanemi apushilua agir ta ser agia ataba merijang ta masü, lakhsa lakh aser crore adoker, saka aji tebushir mali, kechiaser aji Arogoi memetet, anungji Arogo item mapa tamajung nungi temulung meyiptsüla aser Topu Town Arogo nung atalokba amaji tenzüker taküm nung matalokdaksütsü asoshi mauyatsü kümdangtsüla. Ashiko tanü Arogo nung pastor aser sen amshir ochi mashirtem Topu town nung asanguba süngden nung amuoker alidang Tsüngremi teka sotba amaji Aoli pastortem teka sot nungbo Ao Arogo timbaka nung pastor mali koda süla? Anungji item nungi Ao Arogotem temulung meyiptsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kohima nung Baptist Arogotem nung tenzükertem sentong tajung ka agi



Kohima, Luroi/August 28 (TYO): Nagaland Baptist Church Council (NBCC)-i ayongzüka Kohima Baptist Pastor's Fellowship (KBPF) kübok Baptist Arogotem nungi toklang tenzükertem telongjem sentong tajung ka agiogo.

August 27, 2025 nü NBCC Platinum Hall, NBCC office Kohima nung iba sentong ya "Gathering to be Strengthened" omen nung ajemdaker agi.

Iba sentong ya NBCC Youth Secretary, Rev. N. Suhuto Chishi leniba nung agi aser NBCC Social Concern Secretary, Dr. Villo Naleo-i anir tekülem agi. Pai Ibri 10:22-25 nung ajemdaker 'Khristan telongjem ulutsüba' onük jembia liasü.

Dr. Villo-i, "Kechiba Khristanem ama asenoki longjemer? Kechiyong ibaji ajanga asenok Tsüngrem dangi tali anasaba aoer," ta ashi.

Paisa, Khristanem telongjem sentong agibaji tamangertemi maneni teimla alitsü atema lir, ta metetdaksü.

Khristanem telongjem sentong agibaji kati ka meimtsü aser mapang shia ajurutepa kati ka ajungshiteptsü atema lir, ta ashi.

Kasa sentong nung NBCC General Secretary, Rev. Dr. Mar Pongener-i, "From Routine to Renewal" onük jembia liasü.

"Routine ji tasen akümba indang tsükchir ka masü, ajisüaka asentenshitsü atema lenmang ka lir. Anibelemba aser tanela nung shikongbaji Ministry nung 'Dangers of Routine' ajanga lir. Ministry nung tasen kümshibaji Tanela Temeshi ajanga inyakba mapa lir; ibaji ajanga asenok akasodaktsür, tashi tasen agütsür aser Tsüngrem tenzüktsü atema asüngsashidaktsür. Anibelem

nungi tashi agütsür, routine nungi tanela nem lenidaktsüba taküm agütsür, aser ibaji asenok tenzükba wadang ajanga süngjang tangdakja T s ü n g r e m sentsüwangshidaktsütsü atema lir," ta paisa metetdaksü.

Kasa sentong Khamniungan Baptist Church, Kohima nung toklang tenzükertem, Yimkhiung Baptist Church, Kohima nung toklang tenzükertem aser NBCC Staff temi ken tena liasü.

Kohima Ao Baptist Arogo nung pastor Arep Tzudir-i "Ministry Through Relationships" onük jembia liasü. Arep Tzudir-i, Arogo nung lenirtemi nüburtem den tesendaktep yangluba mapang nung osangtajung kanga junga angateta alitsüla, osangtajung melemsadang asenoki tama yamaji taküm litettsüla, ta ashi.

"Ibaji ajanga dang asenoki Arogo nung tamang ajanga inyakba mapa angutsü, temeim aser teimla atema inyakba angutsü," ta pai ashi.

Sumi Baptist Church Kohima nung Associate Pastor, Dr. L. Botoholi Yeptho-i "Staying True to the Call" onük jembia liasü. Lai, "Khristan lenirtem ama khenkhenbo asenoki asenok ya tongtibang masü ama bilemer, saka item ama mapang nungji asenoki Tsüngremi asen nem agütsüba tashi bilemtettsüla. Nisung kar taküm nung temelenshi adokdaktsütsüsa asenok renema dang lir ta metettsüla," ta ashi.

Laisa, "Arogo nung lenirtem ama timtem tulu aliba mapang nung asenoki joko anenadoktsü bilemer, ajisüaka iba mapang nungji asenoki ministry nung tejakleni aoertem den memedemdangtsüla saka meyipa reprangshitsüla aser

asenok tajaba angatetshitsü merangtsüla. Ibaji ajanga asen tamang jenjang asüngsashitsü," ta ashi.

Zeme Baptist Church, Midland nung pastor, Rev. IringtieKauring-i "Integrity and Transparency in Ministry" onük jembia liasü. Pai, "Tanü Khristan ministry nung nüburtem anitettsü melen jenjang arishiba tsütsüleni dang odor," ta ashi.

Paisa, "Ochishiba aser teladak naji kodanga piladaktsütsü makok. Ochi taküm aser teladak taküm ka alitsüji tasak, kechiyong asen taküm nung tajung aser temenen naprongla lir. Anungji Khristan ministry ji taküm junga litetba indang lir," ta ashi.

Union Baptist Church, Kohima nung Youth Pastor, Megozeno Savino-i "Knowing the Sheep: Leading with Compassion and Discernment" onük jembia liasü. Lai, Khristan ministry ji Yisu den nija tesendaktep aliba nungi adokdaktsütsüla, ta ashi.

Laisa, "Ministry takok ngua inyaktsü atema Khristan lenirtemi Yisu dang nungi shisatsü meshitsü nüngdaker. Khristan lenirtemji sarasadem nem anidaktsütsüla aser sarasadema nisung ajak temeim nung züngshitsüla," ta ashi.

NBCC Christian Education Secretary, A. Bideno Kikon aser Kohima Baptist Pastor's Fellowship (KBPF) Tir, Rev. Dr. Ruokuovilie Sachü nati tepela anküp o jembi aser Chakhesang Baptist Church Ministers' Hill nung pastor Rev. Dr. Vevo Phesao-i sarasadema iba sentong tembanga liasü.

Iba sentong nung Kohima nung aliba Baptist Arogotem nung toklang tenzükertem 201 aden.

ANOGO ABEN TSÜNGREM DEN

Ojang Tila Asem Asoshi Tenüngsang

"Aser Khrista Yisu nung aliba tamang aser temeim agi asen Kibuba taochi kanga tali züin"

1 Tim. 1:14

Item ojang asem - taochi, tamang aser temeim ya Pauli pa temulung meyiba nungi rasaa ashir. Taochi meimchir dak malang saka Tsüngremi odang meimba. "kechiyong nisung ajak dangi tekümtet bener aruba Tsüngrem taochi (Tita 2:11) nung Pauli zülu." Khrista shi akümba aser kangki nung angenlokba ajanga taochi sempet ama amshir, anungji shirnoki mulunger parnok dangi iba taochi jungkai adoktsü akok.

Kodang asenoki taochi angatetdir, Kibuba Yisu dak amangba tamang sayur aser Tsüngrem metetba taküm jenjang dangi arur. Pauli aser shirnoki pei tamang Khrista nung ayur, parnok iba yagi melenshidaktsür. Asen tamangi Tsüngrem chir tabensa asen taküm nung lidaktsür.

Tsüngremi Yisu Khrista nung Pa temeim jungkai adoktsü. Khrista nung Tsüngrem den kija tesendaktep maka temeimji angatettsü makok. "Tsüngrem temeim lir" (1 Yn. 4:8). Kodang Tsüngrem taochi angatetdir, Tsüngrem temeim parnok dak talubusa adoktsü. Taochi süngden lapoktsü atema tamang akatsüla. Maneni tanga süngden lapoktsü atema pa temeim angatettsüla. Ajakji Khrista nungi angur.

2019 küm Christian orphanage nungi apuba tanurtem chiokogo

August 27, 2025: 2019 küm Nigeria linük nung aliba Khristan orphanage ana nungi puer aoba tanur 16 nungi tanur 8 bo chiokogo; tanüngba tanurtemji sorkar ket nung lir.

2019 küm December 25 aser December 31 anogotem nung nisung shibelenba anema police-i mita aoba mapang nung tanurtemji apu.

Kano state aser Kaduna state na nung Du Merci orphanages mita aoba mapang nung tanurtemji pua liasü. Orphanage ana nungjagi tanur ajak senteper 27 apu, aser tanur 16 bo sorkari Kano Coty nung lapoka aliba Nasarawa Children's Home-i anir oa liasü. Parnok yangji tesüiba küm pezü aliba sülen taoba Bodhbarnü chiokogo.

Tetsür kati sorkar orphanage ji toktsür Kano nung aliba Du Merci office-i aoba sülen anogo ka lir tanüngba tanurtemji chiok, ta Christian Solidarity Worldwide (CSW)-i metetdaksü.

Du Merci nung staff temi, laji tekolok tera meshidaki kümogo, lai la sasa la den jembir, la khu renemer aser kidangi meyipa aotsü melang ta ashir, ta metetdaksü.

Laji tanaben sorkar orphanage jagi anir ao, ajisüaka tasüngnü sorkari la den tanur tenet chiokogo.

Tanur tipronglaji Du Merci

tentetertem- Professor Solomon Musa Tarfa aser pa kinüngtsü na tonga ogo.

Ano tanüngba tanur 8 sorkar ket nung lir. Kano State Attorney General-i tensa asadangba sülen ang parnok chioktsü. Tamalen Kano State High Court-i tanur 16 pronglaji 2025 küm March 19 anogo tashi nungbosa Tarfas-i meyipa yoktsü tetuyuba agüja liasü.

Tang sorkar ket nung aliba tanur 8 nungjagi tanur asemba 2021 küm January ita nung taoba mapang Kano Governor indang facility kati anir oa liasü. Yangji parnok nem kangshia Arabic sarasadem agidaktsü, mosque nung dendaktsü aser Quran tesayuba agüja liasü.

Christian Solidarity Worldwide CEO, Scot Bower-i sangdong ka ajanga, "Tanur 8 chiokba osang angashia onok pelar, ajisüaka tanubutibaji tang tashi sorkar orphanage nung ayuba atema onoki tebilemtsü katsür. Kano State nung ketdangsertemi High Court obendang tashi mangabaji tejashitsüka lir," ta metetdaksü.

2021 küm United Nations Working Group on Arbitrary Detention-i, Khristan orphanage nungi tanur 16 puer aobaji ozüng alema aibelen lir, anungji tangsa tanurtemji chioktsüla aser international ozüng kübok senotsü temenok agütsütsüla, ta metetdakja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tetangshi**

(adj) mapa aser ken o ajak nung terajem, tangatet (sensible)

* Tetangshi nisungi nübortem nem tangatetba agütsür.

Tetem

(n) süngo tu aser kakat agi chiyongtsü tilala alepba (small food packets)

* Onoki chiyongtsü tetem aika yanglur tanurtem nem lema agütsü.



Tir Yimyim

OLONG PAITEP # 7254

1		2			3		4		5
				6		7			
8									
						9			
			10						
11									12
				13			14		
15									
16							17		

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7253 TELANGZÜBA**TIPIEN :**

1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüing,
10. Omen, 11. Lemta, 13. Ola,
14. Kin.

NAI-A YA METETTER MA

Germany nunger engineer Karl Benz-i 1885 küm yangluba Benz Patent-Motorwagen gari ya alima nung mezüngbuba automobile ta züngshir, koba 1886 küm January ita patented süa liasü. Tetsüing asem aketba gari ya petrol amshiba internal combustion engine kati tashi agütsü aser iba ya anogoshia amshitsü atema mezüngbuba practical, self-propelled vehicle ta züngshir.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

BRO-i Pene-Tato lenmang March ita tashi nung renemtsü**Itanagar, Luroi/August 28**

(Agencies): Border Roads Organisation (BRO)-i, km 32 talang Pene-Tato lenmang koba Shi-Yomi district, Arunachal Pradesh nung Aalo-Mechuka lenmang kübok kanga tongtiba lir, iba lenmang double-laning ya 2026 küm March ita tashi nungbo tembanga yanglutsü, ta metetdaksüogo.

Project Brahman Chief Engineer, S.C. Looniya-i ashiba agi, ali alizükba nung tetsükdaksü adokba ajanga iba mapa ya menomeyanger.

Paisa, Siang district nung Kaying nungi Tato tashi tsüingsang mongpu ajak nung amshitetba lenmang yanglutsütsü parnok nükjidong

lir, ta ashi.

Chief engineer-isa, black-topping yoktsü atema mapang talila agitsü, saka tesem aika nung mapa kanga kara inyaka odar, ta ashi. Tato-Mechuka tsüingda apu 14 yanglutsü atema contractor tem nem agütsüogo aser item aputem yanglu tenzükogo.

Maneni km 12 talang Yarlung-Trijunction lenmang nunga mapa tenzükogo, kong 140-ft steel modular ka densema lir, koba küm ana tsüingda renemtsü imlar. Kasa mapang km 16 talang Yarlung aser Lamang na tsüingda lenmangbo renemogo. 14-km Lamang-Lola lenmang atema DPR tang benoker lir.

Looniya-i ashiba agi, National Highway Single Lane programme kübok lenmangtem ajanga sepaitem atema kinük nung aliba tesemtem den tesendaktep tajungba kümdaksütsü.

Paisa, NH-13 Akajan-Likabali-Bam lenmang anepalutsü atema BRO-i mulunga lir aser iba ajanga Daporijo, Aalo, Yingkiong, aser Mechuka nung sepaitem senzüsenpongtsü atema tajangzük agütsütsü, ta ashi.

NH-13 yagi Lower Siang district nung Likabali aser West Siang nung Aalo na sendakteptsür aser Shi-Yomi district nungi Mechuka tashi aoer.

Tripura Congress tekolakbai Tipra Motha party aitsü

Tripura Pradesh Congress tir Asish Kumar Saha-i Brehostibarnü Tipra Motha party aser party ngutetsang Pradyot Debbarma aitsüogo.

Agartala, Luroi/August 28

(Agencies): Tripura Pradesh Congress tir Asish Kumar Saha-i Brehostibarnü Tipra Motha party aser party ngutetsang Pradyot Debbarma aitsüogo, aser ashiba agi, Village Council election menoa magiba atema Supreme Court dangi ken o abenba ya yimden yimsüsüba tsütsü julushi ka lir.

Saha-i ashiba agi, Tipra Motha-i mezüngbo tribal tem amshia Assembly election nung BJP anema toktep, saka tangbo sorkar pusemdar.

"Kasa mapang nung Pradyot-i sorkar aitsür, saka

tongtibang mapang nungbo pai sorkar kümzüka ayur. Iba ya kecha masü saka yimden yimsüsüba tsütsü tasa ka lir," ta pai ashi.

Congress lenir yagi ashiba agi, Village Council elections ken o ya alliance partners tem tsüingda sensak asemba sülen bentettsü asü.

Paisa, Tripura High Court-i taoba mapang election agitsü atema tetuyuba agütsür lir sürnung asaa SC dangi ken o abenba atema pa aitsüogo. "High Court-i tetuyuba agütsüba ataloktsütsü melena pai Supreme Court dangi ken

o abentsü shim aser iba ajanga ken o tebenjaba kümdaksür," ta Shah-i ashi.

Tribal temi amokbanger aliba tesem nung Village Committee election koda tongtibang iba indang jembiba mapang Saha-i, 3-tier Panchayat system den medemdangra rongsenketzüing nung parnok tashi ajema lir, ta ashi

Paisa, 125th Constitutional Amendment agizüktsü nüngdakba lemsatet, koba ajanga Village Council tem nem rongsenketzüing nung tashi tali agütsütsü, ta ashi

Assam: Dhubri nung JMB den sendaktepa alir ka apu**Guwahati, Luroi/August 28**

(Agencies): Assam nung Jamaat-ul-Mujahideen Bangladesh (JMB) atema inyaker ka apuba sülen India-i artsü aden kiralongrar inyakyim ka Bodhbarnü kaktetogo. Iba ajanga security dak sendakba nung tebilemstü kadaktsüba dang masü saka iba extremist telok aziökba dak sendakba nung Bangladesh tali meita ata tenzükogo.

Assam Chief Minister Himanta Biswa Sarma-i state yimtiba Dispur nung osangbenertem den

sensaksemba mapang India nunger Ali Hussain Bepari Dhubri nung puogo ta ashi. Pai Bangladesh nung amendaker aliba JMB handler tem den Assam nung alirtem number lemsatetpa atema pa apu.

"Ali Hussain Bepari ya taoba mapanga JMB dak sendakba ken o nung puogo. Kulitem ajanga pa kiralongrar telok atema inyakra sayuogo," ta CM Sarma-i ashi.

Security ketdangsürtemi ashiba agi, iba nisungba apuba ya kodanga matalokdangba ka masü, saka iba ya artsü aden

kiralongrar inyakyim nung shilem ka lir.

July ita-a Dhubri nungi JMB atema inyaker Abu Salam Ali, Operation Praghat mapang Chennai nung apu. Tenaprongla ya kasa tesem nungi lir, anungji iba ajanga Dhubri ya India nung JMB pur inyaksangshidak ka ta angateter.

Sarma-i taoba mapang Bangladesh nung amendaker aliba fundamentalist teloktemi India kübok Siliguri Corridor anasa Bangladesh pusemstü atema nüburtem animesotsü akok ta shir liasü.

Russia-i drones aser missiles amshia Kyiv amak, nisung 15 tepset

Kyiv, Luroi/August 28 (Agencies): Brehostibarnep Russia-i drones aser missiles amshia city center densema Ukraine yimtiba nung amakba nung nisung 15 tepset aser 48 yiru, ta yangji aliba ketdangsür temi ashi.

Küm asem raraba tatem kati arudaktsütsü meranga US-i anir yimjung lenmang bushiba mapang hopta ishika tsüngta Russia-i Kyiv nung kanga sashia amakbabo ibai mezüngbuba alitsü. Russia-i linük tesem balala nung strike drones aser decoys 598 aser missiles tabu balala 31 khaloktsü, ta Ukraine indang Air Force ajanga ashi, anungji iba rara nung anünglen nungi amakba nung tesashitiba ka alitsü.

Asürtem rongnung arishi küm 2 aser 17 tsüngta tanur pezü lir, ta Kyiv indang city administration tekolakba Tymur Tkachenko-i ashi. Asürtem timba akumtsü imlar. Ki o jen raksaba agi nembanga aliba nisungtem atsüteter.

"Russia-i jembishinüba langpang melen ballistics ang shim. Alima nung yimjung asoshi jembiba nisung ajunga nungi telangzüba imlar, saka tangatetba tajung nung nokdaktsü melen tangbo aiben ola madoker," ta iba lendong atalokba sülen Ukraine Tir Volodymyr Zelenskyy-i X nung post asü.

Russia indang Ministry of Defense-i sangdong ka nung, Ukraine indang military-industrial complex telung nung military air bases aser company tem nung Kinzhal missiles densema long-range weapons amshia amaka ta ashi.

"Nükjidong ajunga nung kongshiogo," ta ministry ajanga sangdong ka nung ashi.

Ministry-isa Bodhbar

aonung aser Brehostibar anepdang tsüngta Ukraine indang drones 102 khazüka yok aser timba linük southwest tsütsü liasü ta ashi. Krasnodar region nung aliba Afipsky oil refinery nung drone kati amakba ajanga mi adok aser ano Samara region kübok Novokuibyshevsk refinery nunga mi adoka liasü, ta ashi.

Russia indang raraba rongsenketzüng tashi mait kumdaktsütsü meranga Ukraine indang drones tem yagi refineries aser danga totzü ki o jen nung tanen makai amaker, anungji Russian regions kar nung aliba gas stations takong kumdaktsür aser sen timba akumer.

Russia-i decoy drones, cruise missiles aser ballistic missiles amshia amak, ta Tkachenko-i ashi.

Kyiv indang district tenet kübok tesem 20 nung kongshi. Ki 100 jungnüa raksatsü aser yangji city center nung aliba shopping mall ka dena lira ser windows meyirijang aika jaksatsü, ta pai ashi.

Ukraine sepaitemi drones aser decoys 563 aser missiles 26 khazüka yok, ta Air Force ajanga ashi.

Russia-i amakba den raratsü atema Ukraine-i par linük nung nok-nü yangluba tali kumogo. Nok-nü yangluba factories aika miima lapoka lir aser kar civilian tem alidak lir. Russia-i Ukraine indang defense industry nung tenük yoker taochi makai amakdang civilian aika süogo.

Brehostibarnep amakdang Kyiv nung European Union delegation ki aser British Council ki raksatsü. Saka yangji inyaktertem kecha masü, ta EU Tir Ursula von der Leyen-i ashi.

"Russia-i taochi mesayui civilian infrastructure amakba

tangsa anentsüla aser yimjung asoshi jembishinü akatsüla," ta lai X nung post ka nung ashi.

France Tir Emmanuel Macron-ia tang social media X nung, "Ukraine dak aonung ka nung missiles aser drones 629 khaloktsü: ibai Russia indang yimjung tejangrabaji lir. Kiralongra aser tazü mapa," ta ashi.

Nikongdang tashinung nisung ter samar aliba jangjaogo.

Ukraine indang national railway operator Ukrzaliznytsia ajanga Vinnytsia aser Kyiv region nung railway infrastructure raksaba indang ashi.

Ukraine nung rara tembangtsü atema jembishinütsü asoshi ita tetenzüklen Alaska nung US Tir Donald Trump-i Russia Tir Vladimir Putin ajuruba sülen Russia-i drone aser missile meyoktepa amshia kanga sashia amakba ibai mezüngbuba alitsü.

Iba denden nungya yimten yimsüsür temi rara tembangdaktsütsü merangba nung teimla lir ama ajitet, saka iba sülen mera agitsü indang osang kanga ajema lir.

Putin-i yimjung asoshi inyakba nung tetsüng soita ayur aser temulung agüja jembishinü masür aser kasa mapang Russian sepaitem Ukraine linük telungi aier, ta anüolen linüktem ajanga aitsür.

Putin-i rara tembangtsü asoshi temulung agütsüba mesayura Zelenskyy-i Russian rongsenketzüng nung US nem temerenshi tesashiba agütsüdaktsüner.

"Mapang latettsüba ajunga raksaogo, diplomacy asoshi maongka aika raksaogo," ta Zelenskyy-i ashi.

China Victory Day parade nung Kim aser Putin adentsü

Beijing, Luroi/August 28 (Agencies): World War II tembanger küm 80 ajungba temaitsü China nung military parade nung alima lenir aika rongnung North Korea lenir Kim Jong Un aser Russia Tir Vladimir Putin adentsü.

Taruba hopta Beijing nung "Victory Day" parade sentong nung Kim aser Putin shilem agitsü, ta China indang Ministry of Foreign Affairs ajanga Brehostibarnü sangdong.

Iba sentong ya Tiananmen Square nung ayongzüktsü, kong mitkar meyirijang aikati shilem agitsü aser China indang military technology tasentem sayutsü.

Iba sentong nung adentsüpur rongnung Iran Tir

Masoud Pezeshkian, Belarus Tir Alexander Lukashenko aser Indonesia Tir Prabowo Subianto nungera lir, ta ministry ajanga ashi.

Iba parade ya September 3, 1945 den kasa anogo ajuruteper, aser iba anogo Empire of Japan-i Tokyo nung Allied Forces matsüngdang bendanga agüja liasü.

South Korea nungi National Assembly speaker Woo Won-shik adentsü aser anüolen linüktem nungi Slovakia Ato Kilonser Robert Fico kisüng asütsü.

Iba parade nungya India Ato Kilonser Narendra Modi adentsü asü masüar mejangja.

Modi ya kasa hopta Tianjin yimti Shanghai Cooperation

Organisation senden nung adentsü atema aotsü.

Himalayas nung arütsü tsütsü mangatettep adoka 2020 küm India aser China tesendaktep kanga mejungi akum, saka United States aser Tir Donald Trump indang tariff war ajanga rongsenketzüng tsütsü kasa timtem ajurua tesendaktep tajungba akumer.

Iba parade nungya China Tir Xi Jinping den külemi Kim aser Putin nati shilem agitsü imlar.

North Korea ya China indang shishilempaba nung tembar lir, aser Pyongyang nuclear nok-nü sentong mechi linük balalai tenokdangba agüja alidang Beijing-i rongsenketzüng tsütsü teyari tulu agütsür.

Russia-i 2022 küm nungi

MENUNGRA BILEMTETER



Onoki teti meima aliba **Asür Towasenla Walling**, akümlir wadang tembanga August 29, 2024 nü teti pela aliba limai aoba bilemteter.

Na onok nungi pilar küm ka jungogo, ajisüaka nü temeim, ariabilem aser taochi onok den anogoshi lir.

Onok mulungjang aser sarasadem nung na teti lir.

~ *Temeim Kinungertem.*

Pakistan anüdoklen tzümetsüng agi nisung 1.2 million dak kongshi

Narawal, Luroi/August 28 (Agencies): Tzünglu kanga sashia aruba aser India nung tzünokdang alema tzü ayimba yong tzü chiokba ajanga ayong tulu asem nungi tzü muteta adoka Brehostibarnü Pakistan anüdoklen Punjab province nung kanga mejungi kongshiogo.

Tzümetsüng ajanga nisung 250,000 jungnüa tesem balala nung jenoka lir aser nisung 1 million dak tema iba tzümetsüng agi kongshi, alu, businesses raksatsü aser aika pei ki yutsür mainshiteti lir, ta ketdangsür temi ashir.

Anogo ka tejakdang Gujranwala district aser anasa aliba yimtsüngtem nung nisung 15 asü, ta police ajanga ashi. Anogo ana anenba sülen Hokulbarnü tzünglu tali arutsü aser taruba hopta maneni arutsü akok, ta takzütetata lir.

Punjab province nungi senior minister Marriyum Aurangzeb-i ashiba agi, tzümetsüng agi Ravi,

Sutlej aser Chenab ayongtem anasa aliba yimtsüng 1,432 dak kongshia nisung 1.2 million timtemer aser ano nisung 248,000 tesem balalai jenshiogo.

Tzümetsüng agi kongshia alidak relief camps 700 jungnüa aser medical camps 265 amenoka lira ser chiyongtsü aser nüngdakba osettem agütsür, ta lai ashi.

June ita tatemlen nungi Pakistan nung tzümetsüng agi nisung 800 dak tema takum samatsüogo.

Alimar lendong agi mela-mela kongshiba linüktem rongnung Pakistan ya ka lir, aser tzü-mopung melenba agi tesashitiba kongshiba linük ter nungnung dena lir, ta Ato Kilonser Shenbaz Sharif-i ashi.

"Iba ama tarutsü nunga maneni ataloktsü ta asen mulungjang nung teti alitsüla," ta pai tzümetsüng agi kongshia aliba tesemtem semdangba sülen ashi. Tarutsü nung tzümetsüng azüoktsü atema Pakistan-i water storage tali yanglutsü, ta pai sangdong.

Ravi, Sutlej aser Chenab ayongtem nung tzümetsüng kasa mapang adokba ya küm 38 tsüngta tang mezüngbuba lir.

Pakistan indang Punjab province kübok mass evacuations ya hopta tetenzüklen nungi sangdonga lir, kechiaser taoba mapang taküm ama tzünglu maru aser India nung tzünokdang alema ayimba tzü chiokba ajanga tsünglanglen region tem nung ajungben tzümetsüng adok.

Mapang shidak nung nüburtem anizüker aoba, ayong anasa ozüng alema ki o jen yanglua aliba raksatsüba ajanga lendong tulu nungi jenbu, ta Punjab Chief Minister Maryam Nawaz Sharif-i ashi.

2022 nunga tzümetsüng tesashi adoka Pakistan nung nisung 1,700 jungnüa asüba otsü lir.

ICC ODI rankings: Australia nunger asayartem jenjang junga kümogo

Luroi/August 28, 2025 (Agencies): Linük nung South Africa den ODI asaya 2-1 agi mekokaka Australia nunger batter aser bowler tem aika tawa sayaba ICC Men's ODI Rankings nung jenjang junga kümogo.

Mackay kübok Great Barrier Reef Arena nung tatembangbuba ODI asayaba mapang Australia team-i asayar ana out sür run 431 yanglua liasü. Asaya nung Travis Head (142), Mitch Marsh (100) aser Cameron Green (118*) nungeri century yanglua team takok dangi ani aser par asemprongla jenjang junga kümogo.

Batter tem rongnung Head

11bubai tuogo aser Marsh-a jenjang pezü tejakdangi tua tang 44buba nung lir. Maneni Green-a jenjang 40 tejakdangi tua tang 78buba nung lir. Tanabuba asaya nung run 87 yangluba sülen Wicketkeeper-batter Josh Inglis-a jenjang 23 tejakdangi tua tang 64buba nung lir.

Batter tem rongnung India nunger asayar Shubman Gill mannei temaba jenjang nung lir aser pa sülen Rohit Sharma (756) aser Pakistan nunger asayar Babar Azam (739) lir.

Bowling rankings nunga temelenshi kar adokogo. Sri Lanka nunger asayar Maheesh Theekshana aser South Africa nunger Keshav Maharaj na

temaba jenjang nung lir.

Bowler tem rongnung South Africa nunger pacer Lungi Ngidi jenjang timba tejakdangi tuogo. Pa jenjang trok tejakdangi tua tang 28buba nung lir. Pai asaya asem nung wicket tenet agi, koba iba asayamung asayar kati wicket timtiba agiba liasü.

Australia nunger all-rounder Sean Abbott-a jenjang teku tejakdangi tua 48buba nung lir aser Nathan Ellis-a 65bubai tuogo.

India aser Pakistan nunger batter tem temaba jenjang nung lir, saka tang rankings nung temelenshi ajanga Australia team nung asayar tajungtem aika aliba sayur.

US Open: Alcaraz aser Djokovic na tasembuba round-i iogo

Luroi/August 28, 2025 (Agencies): Tang asaya aliba US Open tebur kija asaya nung Bodhbarnü Carlos Alcaraz aser Novak Djokovic nati pei tata asaya koka tasembuba round tongtetogo.

Arthur Ashe Stadium nung asaya nung Spain nunger second seed asayar yagi Italy nunger asayar Mattia Bellucci 6-1, 6-0, 6-3 agi ghonda ka ser minute 36 nung dang kokatok. Arishi küm 22 tain Alcaraz-i winners 32 zükoksü aser world No. 65 asayar ya form dangi arua asayatsü atema maongka magütsü liasü.

Alcaraz-i asaya maneni kokyonga tura pa semifinal nung Djokovic den asayatsü, koba taoba küm Cincinnati final asayashiba ama asütsü.

Tebur kija asaya nungsa Djokovic-i, 6-7 (5/7), 6-3, 6-3, 6-1 agi America nunger asayar Zachary Svajda kokogo. Pa Grand Slam kija asaya 25buba akoktsü atema meranga asayaba mapang ka lir. Ajisüaka arishi küm 38 tain

asayar yagi taoba mapang ama tashi ita masayatetba lemsatepogo.

Djokovic US Open nung tang agi 19benbuba tasembuba round-i iogo aser pa Britain nunger Cameron Norrie den asayatsü, shibai set pezü asayaba sülen Francisco Comesana kokogo.

Maneni Norway nunger 12th seed asayar Casper Ruud-i set pongu asayaba sülen Belgium nunger asayar Raphael Collignon kokogo aser fourth seed Taylor Fritz aser 17th seed Frances Tiafoe natia pei tata asaya koka America nunger timla mesamadaktsü lir.

Kasa asayamung tetsür kija asaya nung Latvia tsür Jelena Ostapenko-i 7-5, 6-1 agi America tsür Taylor Townsend kokogo.

Tetsür kija asaya nungsa Emma Raducanu-i Janice Tjen kokogo aser Philippines tsür Alexandra Eala-a tsükogo. Jessica Pegula aser Victoria Azarenka natia pei tata asaya kokogo.

R Ashwin IPL nung ojang dang asayatsü

Luroi/August 28, 2025 (Agencies): India nunger asayar tejen R Ashwin-i Bodhbarnü sangdong ka ajanga pa Indian Premier League (IPL) nung ojang dang asayatsü telemteba agiogo, ta ashiba den pa linük balala nung tanga league tem nung asaya-a senzötsü tejangraba aliba lemsatepogo.


Ashwin ya Chennai Super Kings (CSK) nungi asaya liasü aser iba club nung pa tarutsü mejangjai liasü.

"Kanga tongtiban anogo aser tongtiban tetenzük ka asütsü südi," ta Ashwin-i X nung zülutsü.

"Tatembang ajak sülen langka tasen ka tetenzük ta ashir, ni IPL nung asaya tanü tembanger, saka ni iba asaya explorer ka ama league balala nung asaya aotsü tanü tenzüker.

"Küm tem tsüngda tajangshiba aser tesendaktep tajung asoshi franchise ajak dang kanga pelar aser talisa @IPL aser @BCCI dang tang tashi nung kü nem kechi agütsüogo, iba atema kanga pelar. Tarutsü asoshi yongyaseta atar," ta paisha ashi.

Arishi küm 38 tain asayar shiba international cricket asaya nungi taoba küm anisüngzüko, tembanga liasü.



pa 2025 season metenzük tsüngda mega auction agiba mapang sen crore 9.75 agi alizüka liasü.

Pa CSK puri tanaben alizükba ya kidangi meyipa aruba mesüka liasü, shiba taoba mapang 2009 nungi 2015 tashi CSK tenüng nungi asayaogo.

Iba sülen pa Rising Pune Super Giant aser Kings XI Punjab (currently Punjab Kings) nungi 2018 küm asaya liasü.

Taoba season pa asaya teku nung asaya aser iba mapang wicket tenet agi. Taoba season team-i junga masayatet aser parnoki asaya pezü dang akok aser asaya 10 nung tamakok anguba sülen bonglang nung tembanga liasü.

Milan-i Nkunku atema £36m agütsütsü mulunga agizükogo



Nkunku ayokba tetezü Chelsea pur tang transfer market nung tajangzük angutsü. Asayar ayokba ajanga parnoki pound million 309 aazükogo aser iba ajanga pound million 277 intoka asayar alizükba liromedema kümdaktsütsü.

Senchi euro million 31 achiba densema Uefa-i tenokdangba agütsür aliba ajanga Chelsea atema asayartem ayoktsü ya kanga tongtiban lir. Iba den parnoki alizükba asayar tasentem Champions League atema register asütsü asoshi "positive transfer balance" ka ayutsü nüngdaker.

RB Leipzig nungi 2023 küm pound million 52 agi alizükba sülen Chelsea nungi asaya 62 nung asayaba mapang Nkunku-i goal 18 idaktsü aser assist pongu süja liasü

France nunger international asayar yagi Chelsea puri taküm Club World Cup aser Conference League akokba mapang tongtiban shilem agia liasü.

Luroi/August 28, 2025 (Agencies): AC Milan-i Chelsea forward Christopher Nkunku atema pound million 36 den add-ons agütsütsü mulunga agizükogo.

Arishi küm 27 tain asayar ya iba Italy club nung adentsü atema taah ajemer agitsü imlar, aser pa temang tendangtsü atema aotsü asoshi temelaba agütsüogo. Pai küm pongu atema tenangzüktepba yanglutsü.

Chelsea-isa, iba

tenangzüktepba nung sell-on clause ka bendenlokogo, aser iba ajanga Nkunku Stamford Bridge nung küm ana asayaba tembangdaktsütsü.

Iba jenjang agiba ajanga Chelsea ajangzüksü, shirnok Manchester United nungi winger Alejandro Garnacho alizüksü atema sensaksem tesüdak lir.

Kasa mapang nung striker Nicolas Jackson-a Bayern Munich-i loan nung aotsü atema jembishinüdar.



August 28 nü BWF World Championship 2025 nung Denmark nunger asayar Christiansen aser Alexandra Boje na akokba sülen China nunger tarep Cheng Xing (tabelen) aser Zhang Chi na tangokba noksa nung angur.

BILEMDANGANG

"Na anemertem nungia dena tangazüktsü aika lir."